

# WEURDJE VANNE VORST

Ein nòw regering die de luj zelf gekoze hōbbe, mer boë ei groët deil achterAAF toch neet gelökkig mèt is. De ein staking nao de anger, veurige herfstj. Ein deil mafketels diej in 't midde vanne woestijn ei spelleke extreme Monopoly aan 't speule zeen. Ei dreigendj tekort aan stroom. Oh, en den vergèet ich nog de gewuuëne, daagdagelikse kōmmer en kwel. De zous dinke det ze 't er òm doon!

Gelökkig woëne wèe in Kinder! Boë de luj nog kinne relativere en boë altiëd de zôn sjientj, ouch al hange ter aaf en tòw get wolke veur. Boë de luj nog karnaval veere en boë ter nog gelache maag wèere. Geneet mèt òs mèt de kōmendje vasteloavesdaag, det is al waat ich uch kin zègge!

Wèe hōbbe al hiël get genote, òm te beginne op d'n èllefdje november. Nao het betoëne van òs respect veur ziëj die veur òs vrijheid hōbbe gevochte, zoëveul jaor geleeje, hōbbe wèe op 't Dörp ei nòw karnavalsjaor aafgetraptj. Nao ei paar fijn oëtstap- pe waas het al snel 10 janewariej: d'n daag van òs groëte Prinsezitting! Volle bak ambiance en de aoj sporthal weer tot de nôk gevöldj. Mèt ouch het Prinsebal achter de rök, kiëke wèe nòw oët nao de apotéjose van dit kort mer krachtig karnavalssezoen: de vasteloavendj!


Op vrië- dig 13 fibrewariej kape wèe gliëk eeder jaor weer de studio van Radio Monza. Stöm tös- se 16:00 en 23:00 ore aaf op 106.5 FM veur eine aovendj sjèe- le zeiver en karnavalsme- ziëk. Dao zeen ouch hiël get sjoën prieze te winne, es gèe dees gezèt höbtj gelèeze!

Zōndig 15 fibrewariej is het stoet, en wèe zeen ter praktis zeker van det 't weer prachtig wèer geit zeen. Kōmtj 'r massaal oët dèen daag, en veer nog efkes mèt òs mèt inne zaal es de lèste wage veurbiej is getrokke. Wèe, Rabbedabbers, rèekene ter op!

Ich wins eederein eine sjoëne vasteloavendj, en ich hoop det oppernòw in hiël òs fusiej eedere karnavalist en vereniging de sjoën momente neet op ein handj kintj tèle!

Dinktj 'r good aan: eine daag neet gelache, is eine daag neet gelèefdj!

# RABBEDABBERS 2015



## MÈT IN DEES EDISIE

- Proklamasie Prins Wout 1
- Proklamasie Jeugdprins Jelle 1 & Jeugdprinses Tessa 1
- Daag vanne landbòw Linssen-Beckers groët sukses!
- Ouch Kinder duit veurstèl nòw name kirkdörpe!
- Fusiejploog Maasland Noordoost: de kinjerzeekdjes!
- Pinot Basdōnk: de gesjiedenis van eine nòwe Kinderse wiën!
- Blek-out in Kinder? Ein alternatief noëdplan!
- Aafval is big bisnes! Danny J. breidj resiklagepark oët op eige inisjatief!
- Fetisj Bosmans veur driejheuk löptj oët de handj!
- Rob Wirix begintj ponieklop in Ophove!
- Ei geheim resept van Pool Frit!
- ... en nog veul miër sjèele zeiver!



# PROKLAMASIE PRINS WOUT I



Gedaon te Kinder inne sporthal oppe 38e prinszitting van 10 janewariej 2015 door ugge 38e groeëte prins van de Rabbedabbers van Kinder, Graaf vanne Neerootersesteinwèeg, Hertog vanne Hagendoren, Baron van ujer tot diëm,

Mèt de grasië vanne Veurzitter en miëne veurgandje Prins, mèt de zèege vanne aod-prinse verklaor ich hiejbij vandaag miën èllef punte.

Ugge euvergelökkige  
**Prins Wout den 1e**

Miën leuze veur dit jaor zal den auch zeen :

*Of de mèlk noë mager,  
vol of halfvol is: het  
muktj neet oët!*

*Met Prins Wout de  
1e gaon wèe fiëste  
mèt de borst  
veuroët!*

**TEN IËSTE:** Ich, Wout Hoeken, bèn vandaag zoë fier es eine geeter. Want ich maag uch vertèlle det ich dit jaor door het lèeve kan gaon es 38e groeëte prins vanne Rabbedabbers van Kinder es :

**Prins Wout den 1<sup>e</sup>!**

**TEN TWIËDJE:** Allein is mer allein, en det is bij mich gelökkig neet het geval.

Aan mien ziëj stuit dit jaor: **Prinses Lisbeth de 1<sup>e</sup>!**

**TEN DÖRDJE:** Ôs kinjer Lette en Frauke zeen ôs groëtste sjatte, ze speule en danse get aaf oppe boorderiej.

Ich kiëk alvast oët nao de stoet dit jaor, met ôs 2 dochters en ouch ôs nõw Jeugdprinsepaar ter bij!

**TEN VEERDJE:** Het lèeve van eine mèlkboor speultj zich aaf tösse kaover en köej. Mer de kômendje maondje laot ich de familie get heller wirke, en kôm ich miër ônger de luj.

**TEN VIËFDJE:** Gelökkig geit det mèlke neet al te meujlik, ôs boorderiej is vol-otomatik! Dich neet môtte bukke veur aan diej ujers te kôme, vindj gèe det ouch neet sjik?

**TEN ZËSDJE:** Vreuger zaat ichj bij KDR, en noë doon staon wèe mèt de Sjaaimakers mèt de karnaval paraat! Es wèe repeteerdje veur ôs èkt waas het altied 't zelfdje: de frigo waas leeg en het waas veul te laat!

**TEN ZEEVENDJE:** Op zaoterdig 24 janewariej is miën Prinsebal, en det veere wèe rojaal. Pak dèen aovendj ugge otto of fits, en kôm mèt mich fiëste in het sjöttelokaal!

**TEN ACHTSTE:** Mèt de karnaval dit jaor, weurdj neet allein mèt water, fris en beer geklônke, Es mèlkboor eis ich op zië minst, det 'r ouch mèlk en choco weurdj gesjônke!

**TEN NEEGENDJE:** Gaas gaon wèe gèeve en sjaai môt er zeen, det môt ich neemes vertèlle! Mer op kulinèer gebeed stèl ich es Prins waal eise: eine lekkere steak in plaats van diej bitterbèl en frikedelle!

**TEN TIËNDJE:** Op eine traktöer bèn ich in mië wèeze, den kin ich de ganse wèereldj aan, De stoet op 15 fibrewariej is bekans hetzelfde, allein hange ter den hiël get sjoën wagens aan!

**TEN ELLEFDJE:** Ich bèn eine muzikale Prins, want ich kin bèst ei stökske reppe en ei denske placere. Det zeen alvast goj eigensjappe, ôm nao de stoet inne zaal ei dik fiëstje te veere!

# PROKLAMASIE

## JEUGDPRINS

## JELLE I

### &

## JEUGDPRINSES

## TESSA I



### TEN IËSTE:

Ich bèn  
Jelle Bogie,  
zoon van Dirk  
Bogie en Inge  
Van de Beek. Mer  
vanaaf vandaag maag  
eederein mich aanspèeke es  
Jeugdprins Jelle den 1e!

**TEN TWIËDJE:** En ich bèn Tessa  
Dirkx, dochter van Roland Dirkx  
en Petra Thijs. Mer vanaaf noë heit ich  
Jeugdprinses Tessa de 1e!

### TEN DÓRDJE:

Es Jeugdprins  
höb ich miën henj miër es vol, en ma en pa zeen  
miën sjeffeurs, veur zoëver det löktj, Ich stèl den ouch  
veur det miën zóster Niene de kómendej maond het ho-  
eshaoje op zich puktj.

**TEN VEERDJE:** Met miën breurkes Luca en Sem, en mèt  
pa bjôs loupe meestal de manskèrels veurop, Mer noë bèn ICH  
Jeugdprinses, en noë zeg ich: vróluj aane top!

**TEN VIËFDJE:** Eine bickyburger is miëne favoriet inne frituur, mer 't is  
eigelik mer ei klein geval, Het jaor van Jeugdprins Jelle,  
is daoveur ouch het jaor vanne Bicky Royal!

**TEN ZËSDJE:** Es ich dit jaor twiefel tösse fritte en pizza, wil ich ze alle twië Want  
es Jeugdprinses weurse inne watte gelag, wat wilse nog miër?

**TEN ZEEVENDJE:** Es manskèrel höb ich veul hobbies, det hoof ich neemes oët te lèg-  
ge. Kômptoetere, weefborde en fitse: ei drök lève kinse waal zègge!

**TEN ACHTSTE:** Danse en turne is het leefste waat ich doon!  
Miëne vriejen tiëd speeltj zich aaf op sportsjoon!

**TEN NEEGENDJE:** Ich wil later bij de pelisse, de boel fatsoenlik regele en get prosesse sjriev.  
Zoë weit ich zeker det de Kinderse luj zich good gedrage blieve!

**TEN TIËNDJE:** Rallycrosspiloot wèere niks veur mèegdjes? Ich zal later het tegendeil bewieze, det zèg ich  
dich! Es ich den in miene rallybak ein reej s riej, eindige de manskèrels allemaol achter mich!


### TEN ÈLLEFDJE:

Ôos leuze veur dit jaor zal zeen:

*Mèt Jeugdprins Jelle en Jeugdprinses Tessa beginne wè dit seizoen mèt eine knal!  
2015 weurdj ei groët fiëst, eine geweldige karnaval!*



# FUSIEJPLOOG MAASLANDJ NOORDOOST: DE KINJERZEEKDJES



Ein fusiej is toch gek gek. D'n eine môt d'n angere neet en ôngekiërdj, mer toch wèere de klômmele biejein gesmete. Gèe kôs veurig jaor al in dees gezèt lèeze det 'r hiël get gedoons waas mèt de fusiej van **KFC Kinder, Blauwvoot Kèsing en Excelsior Ophove**. Wèe zeen alweer ei jaor wiejer, de fusiejploog **Maaslandj Noordoost** is op gank getrokke en de iërste probleme wore ter al snel.

Veur de organisasie vanne Fusiejbeker zaat hiël het besteur mèt de henj in het haor. Het zou oëdreije op ei saai spektakel, mèt drek ein finale tösse **Hoëger Op Biësel** en Maaslandj Noordoost.

Nòw, echte tegestandj zal ter neet miër zeen, mer de môs toch op ein of anger meneer augustus ôm kriëge... De oplossing waas tegeliek geniaal en simpel! Ouch de cafévoetbalplooge zoë-es **de Apasje** enne **Jagers** doon volgendj jaor mèt aane Fusiejbeker. Zoë staoen ter toch nog get matsje op het program veuraliër Maaslandj d'n trofee inne locht maag stèeke. Plus, en neet ônbelangriëk: diej caféplooge vertere altiëd good inne kantien. Weer eine dikke speuler ei seizoen betaaldj vanne opbringst van diej paar matsjkes!

Op het veldj waas ter sprake van eine meujzame start. Diej speulers van het vreugere Blauwvoet en Excelsior haaje meujte mèt 't tempo van 3dje provinsiale. Det geit begot ein vitès sneller es det getaffel in 4dje. Ei paar sterkhaojers van het vreugere KFC Kinder haaje den weer meutje mèt het feit det diej speulers van Ophoven en Kèsing neet zoë snel hanjeldje in dinke en oëtveure es ziejzelf. Det, en de erbamerlikke staot van het plein in Kèsing, zörgdje op korten termiën veur hennig get ernstige blessures. De kinzeist dreijdje euverore aan het begin van 't seizoen! Bij **Pieter Vanhoef** môs 'r zelfs eine alleminium kniëj gestoke wèere. Wèe hóbbe de foto nao de operasiej oppe kop kinne tikke, en de zuuës duidelik det het ein aardig ver-



bòwdj bein is.

Ouch langs het plein löptj het miër es ins mis. Nòw **Rudi Poelmans** weg is oët ziën vertrouwdje Kinderse omgèeving, kintj 'r nog minder remminge. Supporters vanne tegepartiej hóbbe zich al dèk inne haore gedabtj. De supporters van Maaslandj zelf ouch trouwes. Spesjaal veur Rudi heet het klupbesteur eine psiecholoog aangetrokke. Want ei gezôndj liëf, begintj mèt eine gezôndje geist!

Oppe tribuhn en inne kantien is het mer stillekes nao het voltrèkke vanne fusiej. Det ligtj neet aane supporters huuër, het zeen diej leedjes diej op niks miër trèkke. De kins neet zoë mer de naam KFC vervange door Maaslandj Noordoost, det puktj neet. **Jaak Jacobs** heet zich vriejwillig aan-gebooje ôm ein dinktenk op te richte en ôm alles te hersjriewe. Zoë kintje de Sjaaisaajd zaliger missjien trök in lèeve wèere gerope ôm vanaaf kômendj seizoen Maaslandj Noordoost nao de titel te sjriëwe!



Misterie sjëemele keesboom  
op 't Dörp eindelijk opgelost!

Ich dach: "Ei paar  
tekskes veur ei bloom-  
stökske kintj geine  
kwaad..."



Wiej de baas het zuuët...



Wiej ich het zeen...



Este Nix Pax,  
Christe Nix



## OUCH KINDER DUIT VEURSTÈL NÒW NAME KIRKDÖRPE



## GEWUUN MÔPPE

**Twan Smeets** löptj **Lange Né** tege 't liëf op 't Dörp. Twan kiëktj hiël zoor. **Né** vreugtj waat 'r aane handj is. "Jông," zeet Twan "ich höb ruzie mèt de vrouw. Gistere zeen wèe same ônger de doesj gegaon, en ich bèn per ôngelök op heur tette gaon staon..."

Eine Turk kumtj bij **Garage Brouns** ôm ziëne otto in te wissele. Eine otto van 20 jaor aod, mèt mer 3500 kilomèeter! Brouns bekiëktj 't zich ins en zeet: "Mer det kintj neet! De bès mich aan 't bezeike. De höbs aane kilometrik gedreitj!" "Nèenèe," zeet d'n Turk. "Echt neet. Ich höb dèe otto 20 jaor geleeje gekocht ôm mèt te gaon wirke, mer det is 'r noëits van gekôme..."

"Dju," zeet **Dave Bullen**. "Heet 'r mich inne wèek eine miëne Visa oët de portemonnee gepiktj!"

**Bart Creemers**: "De bès toch aangifte gaon doon bij **Bart Douma**, de pelis?"

Dave: "Det wou ich iërst doon, mer ich höb mich toch mer bedacht."

"Dèe miëne Visa nòw heet, geuftj minder oët es de vrouw!"

Boëveur hètj eine wc-bril eigelik eine wc-bril? Ômdesse d'r eine houp door zuuës!



## AANGEBRANDJE MÛPPE



**Seppe  
Vanwijck**

kumtj laat  
toës. Vaajer

**Tony** bjun vreugtj:

“Boë kums dich zoë laat  
vanaaf?”

Seppe antwoordj: “Ich höb  
deze aovendj veur het iërst de  
leefdje bedreve!”

Tony: “Good zoë, miëne  
zoon. Pak dich ei pintje en  
gank zitte.”

Seppe: “Det pintje wil ich  
waal, mer zitte geit veurleu-  
pig efkes neet...”

**Hanne Steijven** tege **Marijn**

**Pouls**, 's mörges vreug: “Ich  
höb gedroumdj det ich de  
hiële nacht aan 't fitse waas.”  
Marijn: “Det is gek. Ich höb  
gedruimdj det ich de hiële  
nacht geweldig gooje seks  
höb gehad!”

Hanne: “Mèt mich???”

Marijn: “Nèe, dich woors  
weg mèt de fits!”

**Cheyenne Breukers** tege

**Jos**: “Pa, ich snap het neet.  
Mitchel zeet det ich ei sjoën  
koetswirk höb, mèt 2 ferm  
sjòkbrèekers en eine prachti-  
ge bumper. Waat bedoeltj 'r  
dao eigelik mèt?”

Jos: “Zèg Mitchel mer det  
esser diën motorkap ope duit  
ôm diëne olie bij te völle,  
det ich den ziëne knalpot  
môt demontere!”



## WIST GÈE DET...

... **Geert Dirckx** euver de  
bingo kaltj in dörde persoën  
inkelvoud?

... de Rabbedabbers mèt ein  
serjeus verjônging aane gang  
zeen? **Ive Kerkhofs en Stijn  
Vanasten** zeen toëw getreeje tot  
de Raod van Èllef!

... dit jaor **Albert Royakkers  
en Hendrik Bruckers** es  
Kroënriders inne orde vanne  
Rabbedabbers zeen oëtgerope.

... **Dries Terium** dit jaor is  
oëtgerope tot Ridder inne orde  
vanne Rabbedabbers!

... 11 jaor geleeje **Ivo 1  
Theys** ôzze groëte Prins waas.  
Det jaor wore **Christoff  
2 Voortmans en Eline 1  
Vandewal** het Jeugdprinsepaar  
van Kinder!

... 22 jaor geleeje **Veus  
1 Peerlings en Angèle 1  
Heymans** hun Prins- en  
Prinsessejaor belëfdj höbbe,  
same mèt Jeugdprins **Wim 1  
Govaers** en Jeugdprinses **Nilly  
1 Janssen**. Wèe höbbe Veus den  
waal neet miër in ôs midde, mer  
wèe höbbe hum sjoën herdacht  
oppe zitting.

... 33 jaor geleeje het het jaor  
van Prins **Koen 1 Smeets**  
waas. En det Koen det jaor  
mèt **Mark 1 Peeters** eine ge-  
weldige Jeugdprins nèeve zich  
haai.

... ôzze veurzitter **Bart Neel**  
mèt ziën lômpe kneuk in ei  
keldergaat gevalle is? En det 'r  
mer leefst 6 ribbe en 2 sjouwer-  
blaaier kepot houw! Mer: hèn  
lëeftj nog!

... Jo ‘**Knauwel**’ **Kwaspen** aaf-  
geloupe zomer vônj det **Patrick  
Gijssels** stônk wiej eine bôk! Mer  
einmaol det 'r gewasse is, is ter  
nog minder mèt aan te vange!

... dit jaor de Prinsezitting weer  
ei groët sukses waas! 600 kaarte  
ter oët inne veurverkoup en  
bekans 6000 kônsumpsies oppe  
aovendj zelf!

... d'r op diej zitting mer leefst  
7 ekts van eige bojem stônge: 2  
kiër de **All Stars**, de **Struisjes**,  
de **Dames vanne Raod van  
Èllef**, de **Sjaaimakers**, de **Sjans**  
en de **Raod van Èllef** zelf! Veur  
de rest zörgdje de **Autarky  
Bress Bend, Hoondervel,  
Tiroler Teufel** en **Juulke** veur  
dikke ambiance!

... zelfs de bèste kameröej van  
**Prins Wout 1** van niks wiste.  
Dèe mins kintj zwiège!

... de KDR-crew en de  
Hemelzoëpers veurtaan door het  
lèeve gaon es **De Sjaaimakers?**  
Ouch bij de karnaval weurdj  
aaf en toë gefusioneerdj!

... 'r dit jaor mer leefst bij  
4 lede vanne Rabbedabbers  
eine kleine kumtj! **Mark  
Hoedemakers** is al vaajer  
gewore, en veur **Raf Nijs, Ive  
Kerkhofs** en **Bart Vanderstegen**  
geit het binne ein paar maondj  
gebeure! Wèe winse diej luj en  
hun partners eine sjoëne tiënd  
mèt hun klein karnavalistjes.

... Ridder 2014, **Marc 'Media'  
Meurs**, zich ouch dit jaor  
weer ferm heet euvertrof-  
fe! Zônger hum laag hiej gei  
Rabbedabberke veur uch, of  
toch op zië minst ein veul dun-  
ner gezètje. Bedanktj, Marc!

# PINOT BASDÔNK: DE GESJIEDENIS VAN EINE NÒWE KINDERSE WIËN

Zoë-es de meiste wiënboore zeen ouch **Koen Quix** en **Brecht vanne Basdônk** klein begos. In het geval van ôs twië kamerôej: mèt ei rekreatief drankprobleem op café en op fiëstjes. Op het lèste wore ze het beer zoë köek det ze inne wiën vloge. Det smaakdje hennig good en Quix kwaam op eine aovendj aaf mèt ei prachtig gedacht: eine kursus wiën preuve in Leuven! Neet allein kinse dao, esse ter veur keest ôm al aaf te slikke en neet oët te tuffe, veur weinig geldj ein gooj klats wiën drinke, de kins ouch naoderhandj ei stepke inne wè-reldj zette in oppe aoj mèrret. Es leefhöbbers van vroluj houwse dus twië vleege in eine slaag!



Einmaal geslaagd es ge-diplomeerdje wiënpreuvers, kreeg Basdônk het get hoëg inne kop. Hèe wou kost waat kost ziëne eige wiën beginne make. Mèt genôg femilie inne boorestiel waas ei stökske good bemèstje grôndj gein inkel probleem, en ouch aan Poolse seizoenswirkers gei gebrek. Ômdet Brecht al veur de grôndj enne arbeidskrachte zörgdje, regeldje Quix ein okkazie kestiëlke, oët eine aoje speeltuin. Want mèt allein ein boorderiej, kinse geine Chateau Basdônk make!

D'r is ôngertösse al get tiëd euver hèer gegaon, en de iërste oëgst droeve waas ei sukses. Het is nog waal neet allemaal wiej het zou môtte zeen, mer Quix en Basdônk tummere langzaam aane wèeg. Wèe gaon de kômendje jaore zeker nog huuëre vanne Pinot Basdônk blanche en

noir, dao zeen wèe zeker van. Es gèe al ins wiltj preuve vanne iërste wiënopbringst vanne oppe Basdônk geteeldje ranke, kintj gèe uch de meujte bespare. Quix en Brecht höbbe alles zelf al opgezope...



IS is gesjrokkte vanne negatieve reaksies oppe ônthoofdingsvideo's

Ze sjakele euver oppe verkoup van Azalea's

Al miër es 10 jaar ei rôndj punt op 't Dörp, en nog höbbe diej Hollènkers ter meujte mèt!

Piër Grispen geuftj wiej altied ziëne neuchtere kiek op ein aantal gekke gebeurtenisse in Kinder...

Môs dich noë altiëd zoëpe ôm plezeer te make?

Mer jeh! Ich kin ouch zoëpe en gei plezeer make!







## BLEK-OUT IN KINDER? EIN ALTERNATIEF NOËDPLAN!

Oppe gemeindj hōbbe ze 't efkes werm gehad toen bleek det Kinder ein vanne iërste dörpe van Belsj is det weurdj aafgeslote es ter ei te-kort is aan stroum. De zuls het mer veur kriège desse zjust nao Familie aan 't kiëke bès en d'n televisie viltj oët! Of erger nog: Op café mōtte gaon mèt ein kèes!

Gelökkig kwaam neemes minder es ôzze börgemeister al snel mèt ei geweldig gedacht aanzette: "Wèe sjakele gewuuën de aojer luj in! Veul goojekouper es het heure van eine stroumgroep, en den wèere diej minskes ouch nog ins get bie de maatsjappiej betrokke!"

De technisse deenst vanne gemeindj is dik ein wèek bezig gewèest mèt het plaatse van ein groëte installasiej aan **Zorgvliet**. Doa is ein hiël groëte akku geplaatst mèt eine splintjernoëwe hoomtrèener d'r op aangeslote. Mèt ein beurtrol

mōtte de aojer minse diej nog ei bitje good te bein zeen allemaol ein half oor per daag van katoen gèeve op dèe fits. D'n illetrik dèe ze zoë opwèkke weurdj opgeslage inne akku, en het vervolg daovan is logis. Het wirktj ei bitje es spare veur later, allein bringtj dit nog get op, want oppe bank kriëge niks miër veur diej geldj.

Es de dreiging òm aafgeslote te wèere piektj, wèere ter binne in Zorgvliet groepslèsse oppe hoomtrèeners gevèeve door eine gediplomeerdje kinesist. Den is het trèere a volonté! **Börgemeister Brouns** is alvast vriëd kōntent mèt ziën geweldig plan. Kinder weurdj neet allein bespaardj van ein aafsjakeling, mer op dees meneer kinne diej aoj luj toch nog get trög doon veur de maatsjappiej, boë ze vanaaf 't pensjoen eigelik allein mer van profiteren! Det noeme ze nòw ein win-win-situwasiej!

## GEWUUËN MÔPPE

**Michel Pepels** heet veul te veul gedronke bie Café Sport en hèe vreugtj aan Riëk of hèe maag blieve slaope. "Det is good," zeet **Riëk**. "Mer den mōsse waal bie **Rina** gaon ligge, want ich hōb mer ei bèd. Ich slaop zelf waal oppe divan." Staags d'r op vreugtj Riëk aan Michel of hèe good geslaope heet. "Oh, det ging waal. Mer waat heet Rina kaoj veuj!" "Det zal waal," zeet Riëk. "Ze weurdj mōrge om 11 oor begrave!"

**Jackie Kit** en **Patrick Verlaek**, allebei aafgevaardigde vanne vakbōndj, kōme inne hemel aan.

Ze kloppe aan bie de hemelpoort, mer ze wèere slecht òntvange door Petrus. "Wiej dōrftj gèe hiej te kōme, mèt al diej stakinge diej gèe op aarde georganiseerdj hōbtj! Ich dink ter nog neet euver òm uch hiej binne te laote!" en Petrus steurtj ze nao de hël.

Twie daag later kriegtj Petrus Satan op bezeuk. "Zèg ins, diej twie vanne vakbōndj, diej mōsse absoluut trök pakke!"


"Boëveur det?" vreugtj Petrus.

Satan: "Ze hōbbe verdomme al twie ovens stil gelagd!!!"

Waat is de geliëkenis tōsse eine groëte Jupiler en Jezus aan 't kruuës? Allebei 33-ers!



# DAAG VANNE LANDBO GROËT



Begin september waas het weer zoë wiëd: door bieë ôzze eige **Jan Linse** oppe boord bêt gedaon ôm de boorderiej op ein sjap wezige luj. Wêe vanne Rabbedabbers wor waas. Of toch bekans... Ôzze reporter ma



Jo Brouns hiltj zich neet aan ziën 'maximum-10-pinte-regel' en het geit mis...



Collega-verkesboore Vanhoef en Marc van Hover traktere op spek mèt eier!



Veur ei mèlkviëbedriëf leepe d'r waal hiël erg weinig kuj inne stal...



In tegestèlling tot de fiëstmenu veur de aandeilhoajers, mocht de bewèegwiezering niks koste...



Veur stoute kinjer waas ter ouch dit jaar gepasdje opvang veurzeen!



Sluikreklam Dominik vanne Bôndj weurdj neet op priës gestèldj!

# DW LINSSEN-BECKERS SUKSES!

d'n daag vanne landbòw! Deze kiër ging het fiëst deriej. **Jan, Thomas en Kurt** hóbbe ferm hun pelikke meneer te presentere aane massaal aante d'r nateurlik ouch bij en we zage det 't good taktje door d'n daag ein aantal sjoèn sfeerbeeldje.



In 't make van 't maïsdoolhof haaje ze get miër tiéd moge stèeke...



Pörfekt Draft doot-het-zelf-tap waas geslaagdj. Eddy en Chantal tege 16 ore al poëp zaat...



Randj animasie 'de sterkste mins van Kinder' veel bije veul luj inne smaak!



Kwisvraag 'zeuk het zwarte sjaop' waas te gemakkelik. Allein Lucske Walen haaj het fout. Dèe dach det het ein strikvraag waas...



Mark Hoedemakers zaat de maandig d'r op bije dokter Bullen mèt röglachte...



Nòw infrastruktuur veur stieregevechte stuijt op groët protest...

# AAFVAL IS BIG BISNES! DANNY J. BREIDJ KÛNTÈENERPARK OËT OP EIGE INISJATIEF!



Ein ôngerwerp waat redelik veul terôg kumptj in dees gezèt is het reile en zeile op het kûntèenerpark. Mer echt gek is det neet: dao zeen mer weinig plaatse in Kinder boë het zoë bruistj van het lèeve. Dao is zoë good es altiëd get oët! Ouch dit jaor ginge wèe mèt ôs redaksie ôs leegt opstèeke, en kinne wèe uch weer eine primeur veursjotele!



Aafval is big bisnes, det wètj ôngertösse eederein. Waat ouch ei feit is, is desse mèt môs gaon mèt diene tiëd en esser zich meugelik-hede aandeene, môsse hanjele! Op ôs kûntèenerpark wirke gelökkig luj diej zich snel aanpasse aan verangerendje maatsjappelikke tema's!



Aafval verwirke is miër es allein mer pepeer, iëzer, greun en rotzoëi. Toen in oktoëber 2014 inne gezèt stông desse binnekort liëke zous kinne oplosse in zoor, in plaats van ze te begrave of kremere, heet **Danny Jaroszewski** snel eine okkaziej liëkefrigo laote installere. "Es wèe te lank gaon wachte, geit strak weer **Begrafenisse Vancleef**

ter mèt loupe!" In aafwachting van ein regeling veur hiël Belsj, wachtj Danny nog mèt het plaatse van ein installasiej mèt zoor, mer hèe heet al hiël get leveransiers aangesjreve veur offertes.

**Roland Janssen**, Danny ziëne maot op 't kûntèenerpark, is ouch begos mèt ein klein biejerdeenste. Ômdet ei resiklaasjepark miër môt zeen es get kûntèeners en aafdaakkes, en ouch get gezelligheid maag oëtstraole, stuit er noë ei klein kröemke langs d'n ingang veur sezoensgebônje verkoup. Zoë kintj gèe inne zomer in 't vervolg nao dao veur eine lekkere frisko, en rôndj de keemis sjödde ze uch eine gooje borrel in mèt ei hartig worstebrouëdje.

Het park is pas good 2 jaor aod en dao begintj al ferm get sliëtaasj te kôme: van al det rundjes riejeginne ze al spoorvorming te kriege inne wèeg. Het beloofdj volges ôs de kômendje jaore nog drökker te wèere in ôs kûntèenerpark det ze bèst **Thei Gitaar** vast in deenst pakke, in plaats van diej wèek vakansiewirk!



Nòw bieje appetièk Staeren: VIAGRA LIGHT



De kins 'r neet mèt voegele, mer het stuit  
waal good in ein zwumbòks !



Vreuger waas alles bèeter en  
gemekkelikker!



Esse ei fièst goofs, tèldje se gewuuën  
het volk, maol zoëveul pòt beer.  
Mer noë...



Ich bèn mèt Yvette  
getrouwdj veur heur  
lang bein en dikke  
borste...



Mer noë heet het  
dikke bein en lang  
borste...



## GEWUUËN MÔPPE

**Gaëlle Ooms** en **Vera Hendriks** zeen same inne Legerstock. Gaëlle zuut opins ein aksie: eine wc-beustel veur 2 euro, 2 beustels veur 3 euro! Gaëlle zeet tege Vera: "Hennig, zoë eine wc-beustel, en echt goojekoup!" Ze puktj 'r 2 mèt heivis. Ei paar wèeke later kòme Gaëlle en Vera zich weer tege. "En? Beviltj het, diej beustels?" vreugtj Vera. "Bwa, neet echt eigelik," antwoordj Gaëlle. "Es de lèste op is, koup ich gewuuën weer wc-pepeer..."

**Ruud Carpentier** en **Guy Martens** zitte bieje De Limburger eine te drinke. "Hòbs dich het ouch zoë drök?" vreugtj Guy aan Ruud. "Ich gaon dèk zelfs mèt miene gsm slaope," zeet Guy. "Ich weit 'r alles van!" antwoordj Ruud. "Ich hòb het zoë drök det ich zelfs miën sikretaresse mèt nao bèd pak!"

**Jan Houben** zitj bieje **dokter Hechtermans**. "Waat is det eigelik zjust, viagra?" vreugtj 'r aane dokter. "Det zeen pillekes diej dich toë laote òm tot 8 kiër per daag de leefdje te bedrieve," zeet Hechtermans. "t Is dus ei kalmeringmiddel!" antwoordj Jan.

## AANGEBRANDJE MÏPPE



**Thieu Heijmans**

wirktj bij de Noliko in Bree.

Op eine aovendj kumptj 'r bjun en h e zucht tege zi n vrouw **Linda**: "Sjat, ich h b echt ei verv elendj probleem. Ich h b d'n hi le daag zo  eine enorme drang  m mi n spel ins inne augurkesni jer te st eke."

Thieu en Linda kalle het same o t en ze spr eke aaf det es het weer ins gebeurdj, Thieu zich door **dokter Bullen** veur dees raar aafwi king zal laote behanjele. Alles geit good, tot Thieu nao 2 w eke opins midde oppe daag bjun kumptj. Linda sjriktj en begri ptj drek det 'r get ernstigs mis is. Ze vreugtj: "Waat is gebeurdj?"

Thieu zuchtj, geit zitte en vert ldj: "Ich k s mich neet mi r beheerse en vandaag h b ich het gedaon. Ich h b mi ne penis inne augurkesni jer gestoke.

"Potverdomme," zeet Linda. "En no ?"

"Ich b n  ntslage," zuchtj Thieu.

"En d'n augurkesni jer, h bbe ze 'm ter o t gekrege?" stottertj Linda.

Thieu: "Gei probleem, en h t heet ouch heure C4 gekrege..."

Eedere mansk erel heet d e kop...



Es de vrouw aan 't steur zitj!



Artrose heet no  ouch Dirk Bogie te pakke...



N w binne bij Jan Arie De Jong: reddingsveste o t Palestina. Bloeze zichzelf op!



# FETISJ BOSMANS VEUR DRIEJHEUK LÖPTJ OËT DE HANDJ!



**Bosmans en co** is stillekes aan bezig mèt het opkoupe van hiël 't Dörp. Ômdesse örges môs beginne, geit Roel ziën aandacht op 't momentj veural oët nao persele inne vorm van eine driejhook. Bosmans ziën bèste kammeröej weite al jaore det d'n driejhook ziëne favoriete vorm is oët de mèetkunde, getuuge daovan is **Katrien** heur sjoën in eine driejhook opgesjore kelderdeur. Oppe driejhook aane Goërterhuuskesstraot kumtj ei merretplein, òm de kònkurensiej aan te gaon mèt 't Dörpsplein. Bosmans ziën kommersjeel geveul kinnendje stuit Steijvers, de greuntjeboor en dèe mèt ziën hanebille binnekort tegeneuver **Pé Theijbers** hunne waar te verkoupe.

Oppe driejhook aan Bouts geit het echter get trager den iërst veurzeen. Roel is al twië jaor aan 't klòmmele en Wassalon Waspuntj is nog altiëd neet ope. De opening is al ei paar kiër oëtgestèldj, mer dao kumtj noë toch eindelijk leegt aan 't inj vanne tunnel. Bosmans heet ziëne nònk al nao de Aldi gesteurdj veur

bitterbèl en frikedelle, dus wèe gaon ter van oët det d'n daag vanne plechtige opening kortbiej is!

De reeje van al det oëtstèl kwame wèe snel te weite. **Jo Kwaspèn** waas namelik ein van de luj diej al ins op proof get hóbbe môtte wasse òm de installasies te teste. Kwaam dèe effe bezeiktj oët! Mèt de vastelaovendj in het veuroëtzicht dacht Jo det het waal ei good gedacht zou zeen òm ziëne griëze pittelèer te wasse, noë hèe dao toch gratis mocht testwasse. Achteraaf waas dèe jas zoë gekrômpe detter hum heet kinne weg goëje. Sjaai! Ein kòmbinasiej van ei goojekoup wasmesjien oët Ruslandj en bôcht van ei waspoejer heet veur al diej ellendje gezörgdj. Bosmans greep drek in en heet de prul in stökke vanein geslage.

Volges de lèste berichte is nòw alles vervange door topmaterjaal oët China, en wirkj de boel veurtreffelik! Hopelik wirkj de frigo oug good, want wèe vanne Rabbedabbers kiëke alvast oët nao de resepsie!!!

# GEWUUN MÔPPE

**Lei vanne Limburger** ligtj röstig in bèd es **Hilde** de slaopkamer binne kumtj en zich begintj oët te doen. Volledig naaktj geit ze veur de speegel staon en ze vreugtj aan heure mins:

“Waat windj dich het meiste op, miën sjoën gezicht of miën sexy liëf?”

**Lei** bekiektj **Hilde** van bove tot ònger en zeet:

“Diej geveul veur humor!”

**Leon Pouls** en **Arlette** nuuëje **Jan Moubax** en **Jetje van Tielemenke** oët òm te kòme èete. Eedere kiër es

Leon ziën vrouw get vreugtj, begintj 'r mèt 'sjaat', 'leeveling', 'duufke', 'honnepon', enzoëvoorts. Jan en Jetje zeen ònger de indrök, want Leon en Arlette zeen al bekans 40 jaor getrouwdj. Toen Arlette efkes nao de keuke waas, zeet Jetje tege Leon: “Ich vinj het zoë sjoën des dich diën vrouw, nao zoë lank getrouwdj te zeen, nog altiëd koosnaamkes geufs.”

Leon kiëktj ins òm en zeet:

“Kinse mich geluive det ich al 10 jaor neet miër op heure veurnaam kôm...”

**Bart Janssen** kumtj biëj dokter Bullen. “Waas dinkse zelf?” vreugtj Fòns.

Bart: “Ich môt eedere mörge òm half 6 sjiëte.”

Dr. Bullen: “Mer, Bart. Waat is den eigelik het probleem?”

Bart: “Ich wèer pas òm 6 oor wakker...”

# ROB WIRIX BEGINTJ PONIEKLUP IN OPHOVE!



Volle bak opsjödding in Ophove, boë de terreine van Excelsior plaats môtte ruume veur het nòw projekt van **Rob Wirix!** Rob is, nèeve ziëne job inne sjoël ouch fervent hobbiejist es het op pèerd aankumtj. Hèe heet ziën spaarcente biejein gesjaartj en is nao de bank getrokke mèt ein iëzersterk bisnesplan. De resultate moge òngertösse gezeen wèere.

Rob geit ein ponieklop beginne mèt alles d'r op en d'r aan. "Aangezeen het lèeve alles behalve ei poniekamp is, laag de naam veur de handj," aldus Rob. "Ich bèn eigelik altiëd good gewèest in het keeze van name. Door de wèek wil ich eine sirjeuze konkurent wèere veur de **Gersalhoeve**, diej zich toch miër richte op groëte pèerd. In alle sjoëlvakansies gaon ter poniekampe door veur de sjoëlgaondje

jeugd. Ich dink det 't ei sukses geit wèere. De môs dich bedinke: esse van eine ponie vils, is de slaag lang neet zoë groët es desse van zoë eine groëte knol duuks. En es ter den toch ins get fout geit, bèn ich good verzekerdj."

Gèe lèestj het: Rob heet alles al good euverdacht. Toen wèe hum vroge waat presies de bedoeling is van diej lasanjafabrik oppe achtergrondj, bleef Rob iërder aane vage kantj. "De moogs noëit diej geldj op ei pèerd zètte," koste wèe nog notere.

Wèe winse Rob alvast veul sukses inne kômendje tiëd en zeen ter van euvertuugdij: het lèeve is gei poniekamp, mer het kumtj ter mèt de vasteloavendj toch kort bij inne buurt!





Het orgasme van manskèerels



Nokia 3310



Het orgasme van vroluuj



Echte vente kôme neet toès mèt blome...



Mer mèt honger!

## GEWUUN MÔPPE

**Wout Hoeken** wiltj gèer ein nòw kòw bij zièn viëstapel. Hèe geit nao ein viëmerret, löptj langs de biëste en vreugtj nao de priëze. 1000 euro, 1200 euro, enz. Opins kumtj hêe bij eine viëhanjelèer oët Biësel, dèe ein kòw heet staon van 250 euro.

“Det is eine gooje priës,” dinktj Wout, en hêe wiltj ze koupe. “Det kintj,” zeet de viëhanjelèer, “mer dao mankeertj waal get aan diej kòw.” “Es ze gemolke môt wèere, trèktj ze heure ujer in, en wienië ze gedèktj môt wèere geit ze op heur kòntj zitte.” Wout dinktj bij zichzelf: “Det los ich waal op!”

Op wèeg heives kumtj hêe **Tom Prenen** tege, en hêe begintj euver zièn apaarte kòw. “Apaarte kòw? Waat is dao zoë apaart aan den?” vreugtj Tom. “Waal,” zeet Wout. “Es ze gemolke môt wèere, trèktj ze heure ujer in, en wienië ze gedèktj môt wèere geit ze op heur kòntj zitte.”

“Kumtj diej kòw missjien oët Biësel?” vreugtj Tom. “Jao,” zeet Wout. “Wiej wèts dich det?”

“Awaal,” zeet Prenen. “Dao kumtj miën vrouw ouch vanaaf.”

**Danny Kunnen** leustj de gezèt en zeet tege **Debke**: “Wistse det vroluj 30.000 weurd per daag gebruuëke en mansluj mer 15.000?” Debke antwoordj: “Det is neet meujlik. Wèe môtte altiëd alles 2 kiër zègge iër gèe get begriëptj!”

## GEWUUN MÔPPE

**Roland Dirx** heet teveul gedrônke en hêe waggeltj de kirk binne. Hêe geit inne beechstool zitte en zeet niks. Pestoer vindj 't raar en kuchtj ôm Roland ziën aandacht te trêkke. Mer 'Piël' zeet nog altiêd niks. Pestoer kloptj vervolges 3 kiër oppe moor, ôm toch mer Roland aan 't kalle te kriège.

Opins zeet Roland mèt ein dôbbele tông: "De môs neet kloppe, hiej ich ouch gei pepeer..."

**Jos Vandewal** is aan 't wanjele en hêe kumtj aan bieje ein boorderiej. Hêe vreugtj aan de boorin: "Ich kôm hiej-levaol oët Kinder, ich hêb ferm doost en ich hêb echt zin in ei glaas veese mèlk. Kin ich det hiej kriège?"

"Gei probleem," zeet de boorin. Ze spoojdj zich nao de stal en kumtj efkes later trôg mèt ei glaas dampendje mèlk. Jos drinktj ze gulzig leeg, es d'n hêndj kwaod begintj te grômme.

"Waat heet det biest?"

vreugtj Jos.

"Oh, hêe vindj het noëits fijn es eine vreemdje oët ziene bak drinktj!" antwoordtj het vrouwmis.

**Patrick Doumen** tege **Dries Terium**: "De bès dees wêk al veur de veerdje kiër te laat! Waat konkludeerse dao oët?" Dries: "Det het al dônderdig is!"



Efkes geine sjêele zeiver in dit stökske! Wêe hêbbe neemes minder es Pool Frit aane tandj geveuldj euver ziën geheim resepte diej 'r gebruuëkdje inne frituur vreuger, in Elkerlyck en inne Heerlijkheid. Pool zal vanaaf dees edisie vanne Rabbedabber eeder jaor ein van ziën spesjaliteite openbaar make, zoëdet gèe zelf get lekkers inein kintj stove!

Dees reis gaon wêe uch stap veur stap 'Runsstoofvleis a la Pool Frit' en 'Kinderse Stoofkarbonade' lière make.

## EI GEHEIM RESEPT VAN POOL FRIT!

Waat môtj gèe hole inne winkel veur eine ketel veur 4 man?

- 800 gram runsstoofvleis (of verkesvleis)
- Zaot, pèeper, tematpuree, ei paar lepels bloom
- Kippeboejôn of 2 à 3 blökskes kippepasta van Knôrr
- Sôkker, broëne sôkker, Gumaris Dônkel of dônkele Trappist
- Zoor uëjntjes, fiën gesneeje uëjn en aziën. Ouch get sjampinjôns.

Waat môtj gèe doon veur eine lekkere ketel Runsstoofvleis a la Pool Frit oppe taofel te kriège?

- Kruj het vleis mèt pèeper en zaot, en bak het den aan in ein pan tot desse ein sjoën broën kleur kriëgs.
- Doot het vleis vervolges in eine ketel.



## AANGEBRANDJE MÖPPE



**Tom  
Van Lee,  
Hendrik  
Bruckers en  
Stijn Vanasten**

gaon op skivakansie. Einmaal bie het hotel vraoge ze veur 3 einpersoënskamers. De resepsioniste môt hun teleur stëlle: dao is allein nog ein kamer mèt ei béd veur 3 persoëne. De mèn twiëfele efkes, mer beslisse toch mer òm de kamer te pakke. De volgende daag wèere ze wakker en Tom zeet det 'r gek gedruimdj heet. "Ich höb gedruimdj det ei sjoën vrouwmìns mèt miën piemelke aan 't speule waas." "Det is gek," zeet Hendrik. "Ich höb zjust hetzelfde gedruimdj!" Zeet Stijn, dèe inne midde laag: "Ich höb gewuuen gege-druimdj det ich aan 't skieje waas..."

- Bak inne pan ei paar solepels tematpuree aan, en doot 'r kippeboejôn (of water en kipblökskes van Knôrr) bie. Vergèet neet good te reure!
- Geet het gehiël euver het vleis inne ketel. Lèt op: het vleis inne ketel môt good ônger de boejôn staon.
- Kook alles op, en laot 't daonao ein 2-tal eurkes op ei klein veurke gaar koke. (Esse 't mèt verkesvleis duis is 't 1 eurke.)
- Veur de aafwiring sjöptj gèe het bovegekòme vèt van 't gekooktje vleis aaf inne bakpan. Doot dao al reurendj get lepels bloom bie en bevochtig det mèt het kooknaat van 't stoofvleis. Good aafsmake en euver het vleis inne ketel geete. Good minge!

### Wiltj gèe leever eine ketel Kinderse Stoofkarbonade? Lèt den good op!

- Doot alle stappe van 't iërste resept. Veur de echte Kinderse Stoofkarbonade zeen wèe nog neet klaor! Daoveur doot gèe ouch nog het volgendje:
- Zèt de braodpan op het veur,

doot 'r 6 solepels water in, 4 solepels sòkker, 2 solepels broene sòkker en 3 solepels aziën.

- Kook det gehiël al reurendj in tot 't begintj te kleure. Blus het den mèt anderhalve tas water en ei half fleske Gumaris Dônker van Opitter (of dônker Trappistebeer). Laot alles inkoke tot det 't sjoëperig weurdj.
- Gèe kintj eventueel nog eine volle solepel tematpuree al reurendj daobie. Doot 'r nòw ouch mer de gesneeje sjampinjòns, zoor uënje en fiën gesneeje uënjtjes (1/2 pot van 320 gram) bie.
- Doot de gewinstje hoeveulheid vleis en saus oët de ketel hiej bie, en ming het good door ein. Es het nog get zeuter maag, kintj gèe eventueel nog get sòkker bie doen.
- Geet zjust veur gèe het oppe taofel zètj de rest van het fleske beer ter nog bie.
- Heerlik mèt fritte, gekooktje èerpelle of krielkes!

### **SMAKELIJK!**

Pool Frit



ZÔNDIG 15 FEBREWARIEJ VANAAF 14:11

# GROËTE STOET

DOOR DE KINDERSE STRAOTE

ACHTERAAF FIËST INNE FANFAREZAAL!



**VRIËDIG 13 FEBREWARIEJ**  
**16 TOT 23 ORE**



**DIALEKTOËTZENDING MËT MATHY & MARK**

**PRACHTIGE PRIËZE, MËT ES HOOFDPRIËS: GRATIS TËNKBEURT!!!**

**Radio monza**

FM 106.5 • [www.radiomonza.be](http://www.radiomonza.be)  
Esserstraat 1 bus 2 • 3640 Kinrooi • 089/70 21 79



**WËE BEDANKE VAN HARTE DE HANJELËERS  
VAN KINDER DIEJ ÔZZE WIMPEL GEKOCHT HÛBBE!**

**HET IS DANKZIJ UCH DET DE KARNAVAL  
IN KINDER KINTJ BLIEVE BESTAON!**



Verantwoordellikke oëtgëever: vzw KVRK, 3640 Kinder. Dit Rabbedabberke is gedrôktj biëj Drôkkeriej Hugo Symons in Bree. De leejout is gemaaktj door Ria Froidmont, dët wirkjt biëj drôkkeriej Symons.